

文登呂星石先生詩舛

10420  
104


圖書印

與發未育不財皆者也曰以養  
人育志而翰各能其後之其存  
一以星石之為人夫翰以人斬  
早耕圃忠愛琳公山耕勤自足  
藉也及齷之見其氣本卦辭云  
西臺映其為人既不映其工也

西臺知其爲人初不知其工於  
詩也及讀之見其原本性情溫  
厚悱惻忠愛根心而恬曠自足  
一如星石之爲人夫詩以人傳  
人有志而辭各指其所之其存  
與發未有不相肖者故曰仁義  
之人其言藹如也予嘗有唐賢  
三昧之選於本原之際  
焉今星石固曰吾適意耳予謂  
適意即詩之所爲原本者是書  
曰詩言志志也者意之決而有  
爲者也志帥而氣充則意協而



法立可以超有象而入無垠陶  
之恬澹杜之忠愛李之曠達韋  
之蕭灑皆是物也夫有古人之  
人而後有古人之詩世有如星  
石之爲人者自知星石之詩矣  
否則言唐言宋皆郭郭耳予與  
星石交旣久而星石出其詩乃  
最後此猶所謂善藏若虛者則  
其揣力於原本以自詣於必傳  
之地有由然矣豈若世俗之爲  
詩者哉漁洋山人王士禛序




序

先儒有云詩以理情性蓋古人本喜怒哀樂之情宣而爲言而覽者因以生其勸懲正其心術焉故詩不本於性情縱極雕繪絢爛非不可一時之目而觀感不生亦何以見作者之能事乎三百篇後惟漢魏諸作猶爲近古六朝無取焉三唐去古雖遠而神遠味雋猶不失作者遺意如工部之沉摯青蓮之豪放蘇州之幽折右丞之工緻皆能自抒性靈而不襲前人之故轍故其詞獨工今之談詩者動以漢唐爲準則

而斤斤摹擬人或譽之曰此初盛也則喜否則艷然不屑也無論未至初盛卽真初盛矣亦不過衣冠類叔敖耳其人固優孟也舍一己之性情而假他人之嘖笑無怪乎詞雖藻麗而味同嚼蠟也又其卑者效顰學步操筆而賦選韻而哦如館童屬對便自詡能詩豈知性情爲何物哉文登呂星石先生初繼予令南寧其後官柱史自京邸緘一編示予予受而卒讀則先生新舊所作東山滇遊燕邸三草也其真性剴切言詞敦厚於事君則忠愛油然於憂民則中懷怵惕於兄弟則友愛及朋友則誠信言發肝膈絕無蹈襲吾不知其體裁果類於漢魏三唐與否而一往真情發於所性沉摯似工部豪放類青蓮幽折工緻又儼然蘇州右丞也以視夫斤斤摹擬以強附於古人者奚啻霄壤哉予將藉以理其情性而興其感奮且以洗世俗之卑陋不在是乎不在是乎豈

康熙癸未三月婁水年家舊寅弟張爲煥拜識



序

詩教至今日而極盛矣


聖天子南薰解愠金聲而玉振之一時臣工喜起賡  
歌彬彬郁郁上規卷阿下掩柏梁於是乎有簪  
筆侍從之臣夙夜寅清靖獻乃心者出其餘緒  
以鼓吹休明如吾大阮星石先生之三草可紀  
已先生以山左名家早歲治經根極理奧原性  
情而敦彝倫因以其所存抒之篇什東山草其  
權輿也齊州九點海水一泓詩之氣象似之泱

決乎大風也哉既而筮仕滇南間關險遠昆明  
越嶲之間去

神京萬里而宦情旅思不以縈心孜孜焉惟簡書  
是畏民瘼是詢其意念深矣卽登臨山水陶鑄  
景物莫不有至理寓乎其間蓋先憂後樂之志  
積中而發有不能自己者則滇遊草爲盛焉及  
其登蘭臺官柱史審審諤諤正色立朝忠愛之  
心不忘於每飯故其撻觚含毫莫不切國是而  
關民生颯颯乎六義之旨也則吾於燕邸草嘆

觀止矣且夫士君子達而在上所以信今而傳  
後者豈徒角勝詞人取悅當世云爾哉必將軌  
則聖賢胞民與物建宇內不朽之奇是故不得  
已而有言則性至而情生理感而氣應故其聲  
之高下與言之短長皆有天節以和之而非文  
士之所與知焉昔劍南媿杜詩於生民清廟又  
曰後世祇作詩人看其推重如此而昌黎亦云  
餘事作詩人誠究極原本之論也予童蒙也於  
先生之詩雖極深嗜好僅能拾其香草而不克

窺厥根柢意海內高明之士苑鴻裁而獵中巧  
應有究極原本而信其必傳於後者或謂王武  
子之得叔非妄語也則茲集其左券云昔  
康熙癸未長至前七日猶子履恒頓首拜撰



自序

予生也鈍總角時從伯氏藩青學承先君子庭  
訓日謹乃幼志毋敢玩物因見世之工詩者捐  
時日劇心骨而爲之以競勝於一字之間竊念  
生人所急當有甚於此者遂不遑以詩爲務旣  
而文戰屢北晚得一第復之伯氏所治嗣又筮  
仕滇南遊歷頓折殆無虛日雖有不能已於中  
者偶筆之槩觚過卽不復記憶及濫竽臺班夙  
夜冰競益不暇求工於此間有所作亦散軼不

加詮次且性善遺忘四韻不能徧識集中非和  
則步不過隨感生情草草適意云爾子若弟各  
錄所得而存之遂以三草名予聞之先正曰人  
有思不能無言既有言不能無聲故言以足志  
聲以永言皆言其心之不得已者十五國之風  
剛柔不齊而性情則一是以太史陳之太師肄  
焉先王所以移風俗而正人心非爲後世詞人  
較勝角材地也自茶陵北地而下各分門戶而  
言詩者莫知所適矣嗟夫詩教之立先聖以之  
治心而後世以之喪志道而流爲技技而近於  
爭宜有志之士所不願爲也予質鈍復疎於問  
學不知詩何敢爲詩願生逢

聖世賡歌成風韶奏鳳儀之日小鳥應和氣而自鳴  
亦或有不得已者又重違同人之請因芟去繁  
蕪勉付之梓以驗生平所歷目寓心存不復遺  
忘而已非敢與海內詞人詡詡焉較工拙也三  
草以歲時次後附伯氏舊什二十首係偶檢之  
宦邸者竢搜輯家藏續刊成帙以示後人俾勿

泯厥志皆

康熙癸未嘉平十日不夜呂琨星石氏書於燕  
邸之拙存齋



評語

盥讀是集寫景幽寂似蘭茝之潔言情華潤似桃李  
之艷而著意偏在忠愛二字語語歸源蓋雖翰墨風  
流直可籠挫古今陶冶萬物不當徒作詩觀

甬江徐子文文駒

詩以性情氣骨為主而學識因之唐三百年間以杜  
甫爲之冠非特以其源源本本一字一句都有來歷  
也正以其溫柔敦厚忠不忘君其性情氣骨實出一

代詩人之上耳讀先生尊集大率清真宛轉洗盡鉛華有孤澹之思沉摯之情有擔當世道撐拄天地之骨有先憂後樂胞民與物之心以故海濶天空山飛海立不雕琢而自工不安排而自健剪燭長吟聲淵淵出金石真快事也至淋漓痛快時直欲俯首至地噫真少陵以後一人矣

不夜畢霞嶺麗台

謝康樂云意愜理無違文章到愜意處則風格詞調俱奔赴腕下故作者以之自適觀者亦爲之移情此古人所以可傳也星石先生之詩評者衆矣或曰似少陵或曰似劍南或曰似陶韋王孟子獨以一言蔽之曰意佳或問意何處佳予應之曰此中有真意欲辨已忘言

洛陽姪元素履恒

原本性情發揮經濟旣高渾而氣厚亦磊落而英多命意深切處不必屑屑傳會古人何家而肖其風神不襲其體貌轉有古人不見我之恨趙評謂其忠愛根心是他善窺作者本領處一語道破可使千古心

服百家退舍矣

五二



東山草

別業送友

不夜呂現星石著



霜天孤墅傍松隈一曲驪歌懶著杯  
遠樹依依雲漸去空梁寂寂月初來  
須知此後書如面好覓從前夢  
若猜自是梅花知別苦隴頭點點望春回

張允文云真至清健  
風格在王孟錢劉間

蕪園漫興步韻

連朝細雨漬莓苔著屐東山傍晚回  
窗外數峰遲月

上堦前一葉送秋來詩材漸老荷初瘦酒興方賒菊  
未開堪羨少年貪努力誦書摩帖不須催

畢霞嶺云  
清思老筆

其二

石徑陰雲覆碧苔蕪園信步自徘徊草存益母培初  
度花對迎春惜老來四季槐從今日放千層榴復幾  
時開流光不耐頻醒眼細雨疎風兩鬢催

趙恒麓云劍  
南細潤之篇

吳松石園柳

不是溈陽處士家門前三五憶年華何當剪拂留新  
月無那飛鳴帶晚鴉幾歲遙攀鄉國夢一枝高映海  
天霞莫傷合抱春催老正待星源寄漢槎

趙云點綴柳字在有意無意之間却  
貼切不可移易由其筆性之高也

感雁

連翩雁影過東阡莫是重來寄素箋三徑煙雲留我  
伴一廬風雪共誰眠向餘病骨書爲癖未了離愁酒  
有權極目長空秋色冷傳將此意倩君憐

趙云昔人破除萬事無過酒又有策酒十勳而加  
以九錫者酒有權三字千古不易之論也杜康而

在雖爲之執  
鞭所忻慕焉

### 感菊

數日貪幽向菊尋最難消受是孤斟  
夢酣夕嶂邀新月興索秋園怯晚砧  
底事那堪醒醉眼天涯何處覓  
知音年來逐逐塵勞裏羞對籬前問素心

### 咏竹

嶰谷根芽種種竒移來茅舍最相宜  
經霜不改凌雲色濯雨全舒棲鳳枝  
層次虚心真氣節丰稜瘦骨自  
威儀生平松與梅知己無數青蠅敢傍籬

畢云可以壽竹  
亦可以壽君子

### 春海棠

一朶輕烟籠曉粧爲誰移却近方塘  
蝶魂有意頻邀  
夢蜂使無情亦惜香怯戰風前依鐵幹  
偷酣雨後潤  
脂光夜深不睡紅綃裏桃綻東園似阿郎

張云字字  
能移我情

### 秋海棠

滿院輕寒逗落暉秋深何物正芳菲  
枝枝亂舞驚鴻  
爪葉葉爭妍拂翠衣暗度幽香翻惹恨  
澹羞穠艷欲

忘機由來尤物偏生妬好護霜威莫驟飛

秋闈下第別墅懷友

秋老山齋響梵鐘倦歸客子意蒙茸十年負我書千  
卷五夜懷君紙一封對酒頻移新徑菊連牀空蟄舊  
時蛩文章雅會猶堪繼去路關山隔幾重

家元素云  
言情凄切

別墅偶興

泉水清清且在山一林丹葉映溪閒高雲自合青霄  
住飛鳥仍當夕日還片石寒苔醒醉眼遠峰黛色入

蒼顏菊花滿地開幽賞莫怨西風塞草斑

趙云情深法老  
唐人得意之筆

冬日送大兄藩青公車北上

長歌一曲步溪東更逐征鴻入曉風挾策十年書未  
倦凌雲千里賦猶雄重裘好耐星霜裏雙鎖頻開詩  
酒中努力加餐消歲暮春明應看苑花紅

和畢霞嶺師生歲暮贈別

大海西隈太白東一廬吟嘯比隆中螢窗環映三冬  
雪麈尾紛披四座風詩酒贈君今日別文章知己此

東山草 卷之一 四  
心同壯懷何事銷殘臆努力春明趁早鴻

徐子文云氣象弘  
敞却又字字熨貼

### 弔曲淵海

十丈寒雲冒雪生傷心極目淚縱橫旌旛高處才名  
盡薤露晞時事業輕幾日襟懷成幻夢頻年風雨想  
交情夜臺知設修文席脩短何須憤未平

弔中翰于千水夫婦偕亾

千水哭母病亾  
夫人殉節報之

鶴駕雙雙返玉京風高千古海天清蓼莪泣廢遑言  
病鐵石腸堅豈為名養志不終心未死捐軀以報氣

猶生驕嘶駿馬人何處空對湘娥弔月明

### 贈孫太翁黌西

製就天衣絕世工布袍落落自高風一空凡馬輪無  
跡萬里神龍骨不同傲俗可知耽阮癖起衰終欲送  
韓窮期君定有芙蓉兆始信顏標勝魯公

趙云通首蒼老拔俗又  
云對屬一氣卷舒最妙

### 賞紫荆

韶光滿樹賞春妍物理分明見性天十世修因方寸  
內一堂慶溢肆筵前虬柯晚發枝偏秀珠蘂先開色

更鮮但得本根常在念芳聲何必屬三田

畢云公兄弟有三式好無尤雖折爨如同居邑人目爲三田詩亦自喻也讀之使人增同氣之重

### 遊東華

春深芳草勝遊時木老山門戀舊枝  
夾岸桃溪清汎汎凌雲松閣碧垂垂  
洞窻不鑿先天智柱石空懸故國思  
屈指滄桑眼底事世人何必苦悲絲

### 冬日遊烟霞

煖律誰將鄒子吹北風冽冽薦巖颶  
棟飛虹彩侵寒殿雪散林華失舊逵  
峭壁冰垂山鬼洞危峰樹老野

人枝七真已在流光變獨對殘陽綠字碑

徐云老氣橫九州

### 山齋雨後

雨後看山山更青風飄門外落花輕  
虛亭讀罷渾無事碁局閑敲酒一罌

### 遊金山

何處飛來怪石堆平鋪水面起崔嵬  
狂瀾欲觸孤根去砥柱能驅萬派回  
泉沸濤聲連海窟塔搖雲影接天台  
吾生最詫遊僊記今到星源亦快哉

東山草 卷之一 六  
元素云揮斥八極凌厲九霄金山必傳  
之篇又云三四寓意高渾自命何等

海潮菴用壁間韻

千頃波頭石剝孤無邊今古一團蒲閒閒飲啄鷗浮  
影幻幻烟樓屋市圖簾捲疎風吹錫杖座懸明月透  
蓬壺興來攜酒同人醉莫問滄桑變也無

畢云此中正有  
微笑拈花之意

宿潮海菴觀日出

幾度蓬瀛一借眠曉來爭覩水雲妍隋珠半向天邊  
剖秦鏡初從海外懸光射殘星隨月落氣吞幻蜃望

風遷羲車又復迴長夜世事茫茫大抵然

趙云詩亦有氣  
吞雲夢之槩

遊鐵槎

和郡司馬  
魏蒼石

海天崛起數峰青水面平鋪列翠屏石勢吞波傾雪  
浪濤聲出谷走雷霆昂雲古木陰千頃斷壁藏書秘  
六丁忽下高軒輕物色恩光蕩漾極東溟

望鐵槎

和魏  
蒼石

山光水色望漫漫彷彿星槎入畫看洞口烟雲閒吐  
納谿邊松竹任暄寒舟迴遠浦浮螺髻月上疎峰掛

玉丸覷破滄桑醒醉眼停杯且聽落珠盤

不第東歸清明日步韻咏柳

繞堤春柳正芳時未許長安借一枝雪盡還留風絮  
舞烟消猶帶露華垂攀來驛路生鄉夢望去園林動  
客思好待乘槎浮漢月會看織女弄機絲

元素云幽細  
字字有意

壬戌春自燕邸之吳橋路別劉章甫家歸

冉冉征塵並轡行別君歸去晚風涼浮名翻致鄉書  
隔岐路還驚客夢長好護豐城藏利器羞彈短鋏理

輕裝停車悵望誰能遣南北平分酒一觴

王路贈別郭瑞卿次壁間韻

西風迢遞幾經過千里傾心一友多燕許文章甘下  
拜沈劉丰骨暗中摩聯君白雪差堪賦別我驪駒漫  
作歌歸去豐城橫劍氣飛鳴勿負十年磨

趙云暗中摩三字似  
乎不對實是的對

浦口別劉岱海之句容

人生底事有分離千里同舟路轉岐裘馬幾曾彈鋏  
慣關山肯許着鞭遲今宵剪燭詩還健明日開帆夢

亦疲無那呼童重置酒與君共醉大江湄

元素云調高意切。徐云一曲陽關正是無可奈何

寄友人

猶憶疎風螢度時滿園秋露碧垂垂閒宵步月空相  
望他日攜壺未有期山果落來香欲致溪魚肥處味  
堪思且將石上幽泉水盪爾胸中磊磊奇

元素云三四接轉處有法有氣

賀同社畢霞嶺選拔

廿年風雨舊單寒把臂常盟此肺肝我昔厚顏君下

第君今晚穎我彈冠秋深碧水隨龍躍春滿金門並  
馬看萬里青雲穩步上不須內語寄長安

題贈曲青海別墅

青海六公子皆佳品也

滿園幽色與空光不數烟霞老石房窗外峰橫連畫  
譜溪邊花引入僊鄉閒宵剪燭徵詩酒好友聯牀話  
肺腸漫步畦亭秋正健森森燕桂有餘芳

元素云一起鑿空結撰出人意表

長至日限韻

時家兄客中州未歸

寒風一夜滿巖阿逋入鴻聲嘹唳過愛日猶嫌宮線

東山草 卷之一 九  
短懷人空望隴梅多菊殘酒續黃花興葭落灰飛白  
雪歌漸是枝頭春未遠會看桃李咲烟波

元素云三四  
情思綿渺

冬日蓬萊道上

朔風飄突雪花涼傍海偏增客恨長何處怒濤驚按  
劍幾番怪礫欲沾裳彌天白日昏如夢古道蒼顏醉  
似狂數泛蓬瀛今始倦須知寧耐是豪強

畢云五六悲壯  
如五更鶴唳

和郡司馬劉西來步大中丞錢公恭紀泉林

御製碑文二十韻

世際貞元會皆逢上甲旋 睿謨周海甸逸興寄林  
泉輦蓋迎千嶂旌旗障百川幽谿滋物色斷碣印真  
詮染翰龍蛇動揮毫星斗懸源流衍洙泗道義炳坤  
乾重以黃麻製兼之綠字傳豐碑應獸立妙蘊許誰  
宣丹雘材惟備經營責有專綸音銜鳳彩鳥篆帶花  
鐫雅調中丞續雄才司馬還人矜工藻續我更羨忠  
虔詞吐青箱古音同白璧堅推敲午夜月點綴夕陽  
烟錦織層雲合珠噴萬斛連高吟山嶽峯長嘯水潺

東山草 卷之一  
浚宏敞柏梁體典華京雒篇顰眉趨步武窺管隔雲  
淵蛙鼓鳴休遇嵩呼祝大年彈冠欣在卽庶勿負陶  
甄

趙云神力百倍高人處在思想之外

和劉月坡石園春雨

不須金谷勝春到興偏賒客話連床雨詩吟滿徑花

柳垂含霧重燕舞受風斜嶺上白雲在回看幻作霞

徐云丰致不減庾鮑

卽事步劉韻

入道嘗嫌淺侵塵唯恐深平生仗志節底事任升沉

出處伊周業操存孔孟心偷閒惟此日山水供登臨

趙云雄渾深厚

野步 劉韻

春朝信步去數里小橋通細雨迷新隴迴風識舊叢

乾坤山亘北今古水流東行止閒閒在桑間話老翁

元素云酷似工部

栽藕 劉韻

何處移周愛新從玉井携一盆水注月數點燕啣泥

透體塵無染盤根性弗迷莫矜奕李艷此下另開蹊  
題孫吉士醉飲 劉韻

生涯詩酒裏醉後典偏狂量大乾坤小才雄江海長  
縱談思往事解贈欲空囊重訂詰朝飲扶歸未忍忘

小猿 劉韻

誰鎖野猿心所恣惟疊嶂貪饕亦可肥拳曲終難長  
未沐便彈冠無風自滾浪哮聲莫與聞計校不如忘

遣意 劉韻

君猶安澹泊我敢妄爲作閉戶且驅寒吟風未覺餓

有書債已酬無竹俗能破盛世任疎狂良朋資切磋

畢云破字押  
得極險極穩

偶成 劉韻

吾生澹所營於位行乎素竟日寂寥居一廬風雨聚  
漫邀圭組榮得勿饑寒懼二月繭空絲三冬葛可屨  
何如叔度來到處民安作

元素云溫柔敦厚之音此  
詩人正旨不似後人怒罵

悟道 劉韻

回頭覩覺岸是處可尋津花落曾無語果成自有因

東山草 卷之一 三  
機關枉作巧衣鉢會傳真畱得深山在悠然鹿豕親  
觀梅有感 劉韻

隨緣皆悟境畱與解人推凍雪能添蕊和風欲透枝  
平分濃淡眼爭趁後先姿人事莫言拙乾坤總待時

趙云是觀梅有感若徒贊梅便無是處

石園卽景

春衣初試曉風寒雨過園林夜未乾拂石參差開竹  
徑裁雲斷續補花欄世情澹遠貧何累吾道虛閒拙  
亦安踏破蒼苔醒醉眼乾坤還向靜中觀

趙云三四絕妙警聯

卽景 劉韻

雨過荒齋草色肥一簾佳氣逗晴暉啣杯冷覩碁中  
局琢句閒敲月下扉綠柳折來堪贈別黃鸝聽罷欲  
忘機乾坤耐老風塵客不放春光入翠微

元素云五六蕭然塵外

文山登眺 劉韻

登臺春暮望此地一爲雄海幹蓬萊北山根太白東  
文章星宿聚道法古今同碑碣曾無字翻能眼界空

東山草 卷之一  
徐云岱宗夫何如齊魯青  
未了先生此作可與匹敵

寒食 劉韻

百六連冬日春寒細雨濛  
斷烟成故事蹈火想高風  
灰燼猶生色繁華自爾空  
寄言熟食者冷煖世情中

畢云斷烟一聯如此  
用故實方是解人

清明漫成 劉韻

空庭寂寞中春色滿花筒  
雨積煙含綠風翻鳥踏紅  
百昌隨物力萬有妙天工  
但得乘時出機緣到處通

元素云五六  
具胸中造化

同劉月坡過孫吉士宅園

近城偏愛僻携手共尋真  
小院苔侵屐疎櫺月到茵  
養花能去病賒酒不知貧  
自有其中樂難同門外人

趙云意則淵明體則子美句則  
放翁吾莫能名先生之所至矣

宋村道上 劉韻

同人驅馬出荒城望望春朝去  
路盈雨洗疎松青引  
轡雲橫遠岫翠為屏  
羸童丐道全衣艸弱婦傾筐半  
餌英恨不監門重作繪  
輶軒東下使君清

偶感 劉韻

閉戶幽棲未厭岑城頭一過暗塵侵乍翻雲雨天如  
陷突起風瀾海似深出沒全憑山鬼伎衣冠難掩野  
狐心人情歷盡羊腸險按劍相看帶醉斟

趙云先輩云爲文蓬蓬勃勃如釜上氣者利之徒也爲文淹淹抑抑如牕隙風者鈍之徒也作詩何獨不然予嘗持此以論詩文生不願儒流作兒女曹聲息

### 別劉月坡謁銓

共君數日談知有幾年別山水羈遊踪風雲壯去轍  
拈花聞素葉把酒歌紅雪

聖主義堪酬故人情不絕深揖帶淚分淡茗連心啜

道氣但常存功名何復說

元素云  
真而老

劉興堯畢霞嶺劉魯瞻孫吉士諸公送別雨留

### 志喜

雷雨餞崑陽德星聚草堂瘡黎忻解澤倦客畏沾裳  
溜急彈蕉夢風迴點雁行留君連夜話爲我洗晨裝  
湛湛塵烟淨霏霏花露香黍苗膏在望岐麥秀何方  
明月開新霽卿雲逗曙光得時應命駕去路看飛黃

元素云情  
適調恬

遊禪教寺

是處攀仙路何須覓十洲閒雲携嶺度野鶴帶林幽  
詩罷吟還壯杯停興未休登高居最上四塞望中收  
禪教寺課後

偷閒薄暮望樹樹領蒼烟得失憑誰是行藏任自然  
思空天地靜理活古今圓老衲還堪話於中晤聖賢

趙云第六句奇警

九日登高未果

秋亦在東籬問芳唯到菊草逃名士臺烟冷聚仙谷

贈遠意雖奢賦高才不淑呼童煖濁醪姑酌送飛鷺

趙云起結冷然

青州道上

驛路塵烟十丈浮微名自古汗征裘偶來綠樹重重  
蓋不減山陰道上遊

趙云清空一氣無限精神灑然而出正他人苦吟  
不出者。憶先輩集中一絕云夾道遙瞻節使旌  
汗流如雨日方中衣冠總為浮名役不博南隄一  
枕風每誦此詩喟然三復今得先生此作遂不復  
誦前詩也

弔古二首

袖鐵光寒博浪沙東南王氣滿瑯琊童男漫道魚如  
嶽弱水空傳棗似瓜遁去仙人應不死望中海若正  
無涯祖龍鞭石千年計山鬼何知一咲譁

又

蒼茫烟水弔孤忠常想辭金蹈海風口可談天傾稷  
下才當亞樂比隆中書成已附聊城箭師老還從印  
墨攻餘燼差能收一戰龍文奔發萬牛紅

再遊鐵槎

回首滄桑一望遙十年曾此狎漁樵九峰夜度蓬萊

鶴萬里朝通閩粵潮遊客登臨低白日仙人宮闕出  
青霄分明已入星源裏何事乘槎泛漢橋

元素云盛

唐格律

移居後喜雨

卜築新移舊草亭連朝疎雨洗檐櫺徑苔積濕侵堦  
綠鄰樹垂陰覆塢青花影交橫鋪霽月星光搖曳逐  
流螢一庭空翠全消暑檢點名香倒酒餅

元素云放翁  
得意之篇

餘干署中答蔡立先午日贈韻

城內有朱子草  
亭註離騷處也

朗讀先生句踈鐘出遠林其風稱近古着想亦非今  
饒有簪花興還憐投糗心註騷亭在左感慨共君吟  
除夕前一日雪 得麻字

江城歌管遶千家簇簇天葩薦歲華栢葉尊中飄玉  
葉椒花盤裏落梅花再添一線年將盡賸有三餘興  
正賒愛日還須連夜飲春明萬事貢朝衙

畢云五  
六精切

江西客邸口號五首

鄱湖三月又重過柳色輕柔逗綠波忽見陌頭飛紙

蝶鄉心愁聽單魚歌

又

西江四月薦新鮓妙手烹鮮自奏奇寄與阿兄懸壁  
上莫因鱸膾起鄉思

徐云清言如話  
老手方能到此

又

雨漲榴紅五月初眼看蔓草滿庭除呼童爲我開茅  
塞好護芳蘭仔細鋤

又

六月扁舟泊斷隈無端風浪觸檣來平生自仗唯忠  
信萬里鯨波一棹開

官衙七夕祝仙姬巧術須傳下吏知未見貿絲常作  
織相將無米便能炊

龍舟鬪

烟樹蒼茫郭外橫江城鼓柁彩龍爭養成鱗角初騰  
蟄幻出風雲曉弄晴滿日飛濤霖雨氣彌天喧鼓水  
雷聲年年此日稱佳會誰念王孫恨未平

元素云徐云工麗  
予猶喜其一結

餘署九日答胡獻若送別韻

胡先世文定公有  
居業集獻若名之

琛家兄門  
下士也

閒披名集我懷殷居業堂前蘭桂芬早識白眉良在  
子今看黃菊澹如君贈來珠玉翻新譜別去山川繞  
暮雲雁度西風官舍冷座中樂得汝爲羣

徐云三四  
澹秀深穩

東山草卷之一終

滇遊草

不夜呂琨星石著

朱橋次壁間韻

烟柳扶疎落日黃  
海風拂拂動微涼  
馳驅萬里初爲吏  
冰蘖將來仔細嘗

又

東望扶桑渤海濱  
垂綸十載羨游鱗  
烹鮮自愧非能手  
漫向滇池學問津

張允文云二詩章法絕佳  
○家元素云一氣貫注

早發次寒亭壁間韻

星光搖曳催紅曙柳色輕柔點翠微馬識前途嘶正  
急風吹曉露欲侵衣

趙恒麓云確是早發字字精字字作

過晤鹿邑令家任菴

鶯聲柳色鬪芳辰五斗長驅萬里塵尊對越干詩尚  
健榻畱邗上夢猶頻渡河麥秀分青靄入縣花飛匝  
綠茵清白吾家傳已舊可將何術牧漁民

元素云情事真切結意深長○張云格律堅穩

鹿署借諸季燈下賞牡丹

牡丹花下敞家筵銀燭光搖色色鮮紅倩朝霞偏愛  
淡白畱春雪欲爭妍絃歌奏績推言偃詩酒徵歡屬

惠連贏得名葩種富貴枝枝香艷草堂前

徐子文云三四紅白二字必如此用方覺化腐為新使人諷咏不已○張云香艷在温李之間

鐵鳳亭懷古步韻

亭在襄陽城南背江面習家園羊祜碑立其右

五色祥鸞九轉成翩躚羽化一身輕豐毛棲枳能藏  
用健翮凌雲莫計程碑弔羊公空墮淚池傳習氏舊  
知名於今勝槩逃荒草幾度江湖咽晚聲

畢霞嶺  
云清老

荆門道上早發

荆門曉望四山低  
烟霧迷離過小溪  
鄉思頻通千里雁  
客途惟仗五更鷄  
問餐野店藿堪茹  
驅馬荒城烏欲棲  
拯救無權慙下吏  
好將鄭繪作筌蹄

元素云通體清壯

荆門道上喜雨

荆門州在萬山之中城南一山獨高上有孤塔尖銳入雲名靈

驚山西南有虎牙關亂石巉峻斑斕有紋類虎之牙以其險也

東山過客入荆逵  
恰是蒼生望澤時  
麥綠漸消橋已

瘦桑黃未隕  
葉將菱寧甘  
雨漲星軺隔  
却喜陰濃石

乳垂且莫連  
封書大有眼前瘡  
赤未全醫

趙云愈樸老愈矜秀一氣如話猶其餘事

和李厚餘宿澧州作

勝遊萬里走江湄  
澧水停帆暮靄垂  
白雪吟成高調早  
黃梁夢到和歌遲  
關山自耐風塵客  
今古爭閒信宿時  
但得村醪能買醉  
怡情何必泛金卮

趙云讀此詩知先生胸次無些子渣滓識解超人宜詩句之絕俗也○徐云五六多少感慨

赴滇過爽源

即爽源洞晉時漁人黃道真問津處也

萬里王程正未休  
籃輿報道武陵頭  
旡源仙子空留  
洞溪上漁翁還  
泛舟瀑布湍飛懸  
絕壁蠶峯疊聚砥  
中流秦人往事何  
須問覩破滄桑好  
宦遊

畢云清  
空一氣

### 旡源道上

纔經過武麓旋復渡  
旡川樹缺危峯補雲生  
斷壑連泉聲噴四壁  
鳥道闢千年不是長  
爲客那知別有天

趙云  
朴老

### 馬底遇雨步韻

四圍雲嶂合不火  
徧飛煙雨急奔谿  
下風回落渡邊危  
橋緣獨木疲馬滑  
流泉莫憚王程苦  
勞勞自古然

元素云工穩中有風骨一  
結温厚是杜子美遺法

### 馬底喜晴

馬底驛山荒路險俯臨深壑  
邊樹梢拂馬鬃下望令人心悸

喜見天顏霽何愁  
萬里行披衣看落月  
驅馬踏新晴樹洗千  
巖淨雲收萬壑明  
好藏霖雨用畱待  
石頭城

元素云聲  
情俱愜適

### 辰溪道中呈翁樵仙令君

辰溪縣爲五溪之一  
江岸奇石森立水際

浪花浮碧  
最爲佳勝

明明逸士圃倩作宦途遊谷曲樵蹊引溪深釣艇浮  
雨雲翻世態巉瘠繪民憂試問專城者如何是善謀

趙云一腔忠  
愛淋漓毫端

和劉麟洲同姪作人辰溪遇雨作

江城烟雨賦新詩望入霏微片片絲勁骨嶙峋千丈  
石好音縹緲數行鷄一錢不染君家事萬仞須登兒

輩時伴我暫歸蓮幕去清風霽月兩相期

趙云有出無對詩人之累先生對句每出人  
意表却又甚切甚工此自天才人不能及

次公坪壁間咏小龍門韻

西望秦川勝蹟存移來此處又龍門浪翻谷口魚吞

峽香滿枝頭鳥啄園潦水含烟迷去徑濃陰擁樹失

前邨到來騷客多佳句知己相看把酒論

元素云三四千古絕調通  
首亦稱。趙云高調似孟

公坪驛次汪天麗山中雨行韻

問津將近芷江頭雨歇重來積翠浮夾岸嵐煙穿洞

出懸崖瀑布接天流萍翻別渚離還合雁浴平沙去

復留客裏山川多勝致新詩寫作畫圖收

張云三四自然峭麗  
趙云冥搜所不能得

次汪天麗借宿山家韻

空山急雨響流澌  
寒寒王臣靡所之  
幾度溪橋迷曲徑  
數家烟火隱踈籬  
老翁款飭和根菜  
稚子撐床帶葉枝  
踏徧緇塵觀世態  
好從此處化嗔癡

趙云三四如畫

河阻遶道山蹊

星輶阻驟雨石浪起  
鯨波邊吏不遑已  
輿夫其奈何  
攀帷穿枳棘攬轡駕  
岩阿苔滑新開徑  
松拖舊着蘿  
好攜小草去莫作畏途過

趙云巉巖曲折中極盡容與之樂宵襟可知

雨過沅江有感

沅江為五溪之一城南有江西橋橫跨江流上構長廊列肆居

貨皆江西人故名江西橋

烟雨空濛十丈浮  
沅江爭勝澧江頭  
長虹斜渡橋成市  
古柏高蟠月映樓  
機盡白鷗飛欲近  
情深碧草色偏稠  
閒雲野鶴頻相顧  
漫道人間風馬牛

趙云變幻百端了無迹象。張云一結風致矯矯蕭然塵外

過蜈蚣關

此關曲折陡峭為辰陽上下諸坡之冠

山險乘無隙崎嶇一徑開  
五丁誠異矣九坂豈竒哉

緩步隨高下危行任往來前蹊莫另闢到處是天台

清浪口客舟晚泊

楚之南界也江岸皆山野苗所居

荒城孤艇泊日落晚煙籠江月生虛白村燈射遠紅

篙停千慮息帆捲四天空客夜同流水羲輪又轉東

張云逼是少陵

鷄鳴關

關踞山上山勢陡仄路俯江岸洶洶水聲如流足底

登高躡險仗吳鉤起舞鷄鳴願效劉事滿五更人尚

夢途窮千轉客還遊浮沉江上畱醒眼名利關頭報

曉籌盛世無煩嚴鎖鑰悠悠車馬帶雲流

趙云寄托無窮張云三四曲盡

華嚴洞次張鏡心韻

洞口有不象內有石羅漢石觀音由石罅匍匐而進

復有石床龍枕

靈巖幽邃絕塵氛蔓絳枝峯不與聞石駁渾成真色

相洞源深入自氤氳有時滴漏飛花雨是處垂旒結

彩雲何物莊嚴天造巧還餘枕簟繞龍紋

趙云詩境亦似彩雲花雨紛紛墜落○元素云當此奇境纔有此佳句摹擬不得

雨阻偏橋遊報恩寺

偏橋城在沅水之西水上長橋蜿蜒蓋鉅觀也

積雨遲行客探奇問梵宮徑泥尋石礧殿蠹帶雲封

法象千年古山門五色空源頭留活水不逐大江東

趙云直  
通唐人

飛雲洞

在月潭寺右巖高百餘尺中虛下嵌石液融結玲瓏譎奇之狀無所不有如雲

霞龍象樓臺亭榭鐘鼓幡幢驚濤激石極神工鬼斧之巧又有古柏參天蒼古特絕面前

忽起三突  
名香爐峰

鴻濛一片石混沌五丁開洞闢玲瓏出霞飛斷續來

曇花擁寶座爐篆峙荒隈皎潔潭中月虛空鏡裏臺

嵯峨形怪獸澎湃走驚雷浪湧千江立山驅三島迴

豐碑皴黛色老柏孕虬胎雕繪翻成拙文章未見才

古今幻化爾造物亦奇哉

張云刁斗森嚴非棘門灞上軍也極擅排律之長○元素云字字驚心動魄言言搖岳凌洲

過興隆關頭坡

興隆形勝西連樊道南極牂牁重岡疊擁二水環流今歸并黃

平州

歷盡奇峰天近西迴看轉覺白雲低履屨儘可先登

岸躡險何妨另闢蹊十里巔行平掌上四山環峙列

眉齊始知此外乾坤大培塿那堪久借棲

張云起  
勢突兀

陽老驛

驛有小城跨山上石筍林立如劍攢戟張狀殊險惡

由來天塹雄南塞扼險無如此最奇古徑嵯峨飛劍  
鏘荒城瓦礫走沙陲夾山高峙重重壘帶水深臨曲  
曲池何物披圖歸

聖主還應德在繫民思

葛鏡橋

石壁峻削下瞰麻哈江水黝如漆深不可測昔有葛鏡力建此橋三年不成乃禱於黎峨之神俄有人指曰有砥柱字處橋可成鏡覓得之蓋石紋所結也橋遂因之得成

忽臨天險驚飛渡石砌危欄曲曲裁削壁千尋兩岸  
合奔濤一過萬山開橋通今古人何去砥柱乾坤仙

自來多少風塵名利客不堪此地共裴徊

畢云蘊藉可思風神無限

五日歇黃絲驛

此驛嶺路險窄地近苗彝

五日停驂溪水東村醪能買客顏紅奚童爭洗櫛花  
雨兒女還簪艾葉風蒲劍懸門消宿瘴龍舟飛渡弔

孤忠千秋豪興畱今夕雲影山光逐去鴻

元素云工力悉敵結尤陡健

玉杵關次韻

前後奇峰轟起上有觀音閣松杉綠蔭瀑布斜飛過此殊有生趣

危關一徑鎖長春度越乾坤幾許人詩滿客途敲月

冷花幽僧舍引盃頻天涯山水偏多興海內風塵未  
老身信步徐來仙路近吾徒到處是知津

張云灑然而去如彈丸脫手天才也

憑虛洞

洞周圍如華蓋大石中擎如柱有石笋石佛石繖石龍石猿等像皆石痕作雨

溜紋結成又有石鐘石柝擊之若金木聲再入又有石羅漢千秋田田皆細石坵畫分明

真竒觀也

幾堆飛絮擁荒隈杖策幽尋古洞來色相班班隨物  
幻徑蹊曲曲任人裁中擎一柱天根立倒湧千波地  
戶開門對溪流山更靜此身如已到蓬萊

元素云老氣橫九州子厚柳州諸作無此竒偉

過雲頂關

高峻為諸關之最周圍山腰時有雲出如綿故以雲頂名之

朝看曙色漾晴隈嶺上閒雲獨往回幾度飛煙山半  
合數行飄絮水中來衣冠搖曳星辰動劍佩遄征日  
月催四海遙從一氣接憑虛直欲到天台

張云何等胸襟何等眼界

貴陽山行

貴陽府為貴州省城漢之牂牁郡即羅施地峯巒特立尖圓挿天如無數

青螺浮於水面

歷盡黔山與未窮突來此處訝神工峯峯笋立叢盤

谷顆顆珠圓落碧空怪石深藏嬌鳥度幽林橫巨野  
雲通別開生面畱青眼不與枝巒蔓徑同

張云笋立二字  
可謂善狀黔山

活佛巖巖上石佛土人相傳從西域飛來其形甚怪共有十尊分布各處此其一也

何處飛來佛一尊山胎石骨脫空門脚根獨立乾坤  
定眼底常看雲雨翻煙火人間無可着莊嚴梵宇亦

徒存相傳證果還餘九此老全無衣鉢痕

畢云清空一氣如話而其中妙緒無窮正他家掀  
鬚苦吟所不能到諷咏再四欲不拍案掩卷而叫  
絕得乎○元素云  
三四是自命語

安順看山

山勢攢疊石頂苔厓俱作旋螺形若  
大若小星羅碁布各自特立不相牽  
屬秀麗分明真  
宇內奇觀也

看山臻絕勝未許畫圖傳石結層層塔僊招簇簇筵  
插天圓更削立地斷還連心愛無錢買驅來不忍鞭

徐云一結已寓廉慈二  
意閒中具見居官本領

望水亭觀瀑

亭與瀑布相對飛泉懸注如銀河  
直下噴珠捲雪入于犀牛潭中水  
色碧綠深不可測黔之瀑布  
多矣未有若此之大觀也

望水亭前暫憇畱木蘭香處對龍湫煙含漂練穿雲  
出石觸飛濤帶雪流爭訝晶簾藏古洞還疑潭影耀

靈牛此行漫說登僊去恰遇星源紀勝遊

張云翻景新穎

關嶺

過灞陵橋上關索嶺凡四十三盤路如蛇行雁字此黔山最險處山半有壯繆祠山頂有順忠公祠是壯繆公子名索相傳從丞相亮南征為先鋒忠勇有父風苗人立廟尊之

黔途力戰久曾未曳兵行突爾接關嶺目搖神復驚

忠心堪繼父勇槩果難兄天地為之震山川應與盟

泉犇聲吼電樹動影飄旌片石重重鎧層巒叠叠城

千盤危磴折萬仞斷巖擎俯瞰吳江冷平吞魏軸傾

蠻峯推領袖蜀道任縱橫獸挺亡羣出鳥飛下谷鳴

漢朝宮闕盡野祀藻蘋并再拜將軍廟英風凜凜生

元素云律帶古意似張曲江禱雨詩漢朝宮闕盡尤是居要語

聽鷓鴣

見說鈞鞞唱鷓鴣冷然入耳遍南湖江天賦雪音成

曲客路聽歌行且需暫借鷓棲叢枳棘肯同鶯囀濫

笙竽風流別調應遷谷響振喬林致更殊

張云五六想見自命之高

鷓鴣

形如雌雉啼行不得哥哥五字甚真

歷楚過黔將近滇家家梅雨鷓鴣天謾道哥哥行不  
得安行則聖勉行賢

畢云小  
中見大

盤江鐵索橋

盤江源出烏撒東南流至廣西入  
南海江東陡厓水激石聲若奔雷

其色濃綠若膠漆上有鐵索橋左右各大索  
四條穿入石壁旁有小索相維鋪木爲橋鎮  
以巨石上覆板屋紅  
欄碧瓦屹然巨觀

犇濤斜入萬山叢橫亘長橋卧霽虹鐵練盤空維地  
軸雲樓插漢泛天宮江間艫舳千帆靜海內車書一  
徑通 盛世何曾勤遠畧于今清晏告成功

張云雄  
警稱題

過雲南坡

坡在貴州普安界極其陡峻升其上  
可以望見雲南故名雲南坡此黔界

之扼塞也又語云雲南  
風貴州雨地氣之異也

滇名黔嶺起崔嵬保障平分亦壯哉莫放顛風吹北  
去免教霪雨過南來危關杙渡行將徧綠野青疇境  
別開共道石城佳景近獨慙潘令種花才

張云首尾  
圓轉如意

南寧署中感詠

并序

余古登人也家傳清白務期資父事君幼習詩

書頗識保民如子今者筮仕茲土彈丸之區役  
衝賦重且兵燹疊罹水旱頻仍供應煩而凋敝  
殆甚加以前此八九年之捏報虧空萬狀叢脞  
千端交代未楚甫兩月而叅罰隨之欲急公而  
難爲下欲恤民而難爲上懦則人玩烈則人怨  
動多掣肘目擊心傷計惟於自身刻苦衣粗食  
淡廢寢忘年凡舊例所有供給縣衙陋規盡革  
而究無補於民間之萬一也感而成詠因以災  
石焉

萬里來官澁弗禁瀟湘江上淚涔涔一團茅草誰爲  
斬百結蜃樓何處尋無藥可醫瘡起肉有丹難點石  
成金我懷荼苦終奚補空抱先民不忍心

趙云我欲淚下想  
見先生菩薩心

和中秋闈中翫月

一片高懸萬戶明溶溶庭桂靜無聲光分金馬通宵  
白影入昆池徹底清翰墨凝香廳四座珠璣耀彩重  
連城龍門深處趨陪久忘却浮名絆此生

張云通首工力  
風調不減盛唐

其二

果是今宵分外明  
龍門瀟灑咽秋聲  
簾空瑣闥心同照  
鑑澈冰壺影更清  
朗朗入懷人盡玉  
溶溶拂檻錦爲城  
曾無霧縠迷青眼  
爭看瓊枝帶露生

庚午仲秋廿四日同薛雨蒼張洎谷同年闈中

小飲

秋滿空堦老碧苔  
棘圍深鎖一尊開  
已將明月支銷去  
又倩黃花點染來  
撫字無能誰借箸  
論文猶得共啣杯  
鶚書會見彤庭下  
不負雙懸玉尺才

張云三四可傳

賀門人趙紫鈞秋捷

婆娑桂影舞雲衢  
共曳新香意自殊  
玉立清標霞並舉  
花飛彩穎錦平鋪  
無人不識君家舊  
有子何愁吾道孤  
計日春明紅杏發  
南枝早掇贈區區

徐云頸聯高脫

九日東薛雨蒼張洎谷年兄登高

宦聚天涯逐隙過  
登高漫約步青莎  
十年壯骨消磨盡  
萬里羈懷嘯傲多  
菊酒差堪供客醉  
萸囊未解療

民疴一官遞莫愁千種同調相看其謂何

徐云蘊藉風流

卽日泛舟湖上

序入深秋爽氣開層舟遠泛亦登臺潭寒點點浮鷗  
近稻熟匡匡薦蟹來落帽風高黃葉外題糕人共白  
雲隈木蘭一曲偏多興不到星源未肯回

元素云錢

劉佳什

九日同向石邨泛舟湖上步韻

登高人未果載酒共盈船負郭舟爲圃孤汀網是田

歌飄綠野外觴泛白雲邊無術休民力徒邀醉飽還

元素云起句與邀侶以官解同妙結句眼前語人不能道良由無此心曲安能僞換出來

重九後二日向石村以湖遊歸晚登寓閣詩二

首見寄依韻答之

薄暮還高興登樓敞客臺雲封千嶂合風捲半輪開  
底事天涯隔知音海內來相逢無所贈珍重曉寒催  
又

茲遊真不負重整夜深杯有客牀長對無香花昨開  
凭欄高眺去踏月放歌回黃葉白雲意問誰消受來

元素云二首承接合法。越  
云無事繩削自然入微應節

庚午九月同遊五華山

并轡高原瑟瑟秋當年歌舞共誰遊雕闌玉碾迷荒  
草畫閣金鋪逐浪舟夢裏乾坤皆北向眼中今古盡  
東流碧鷄金馬曾無恙達者於斯悟未休

元素云壯節和音深情至性了然心口之間粗視  
之若率爾操觚細咀之則邈然含毫此真盛唐絕  
詣必傳  
何疑

贈別張允文二首 滇遊草曾倩允文  
檢閱賜以弁言

去在天涯逢歲暮把杯相送意淒淒月侵霜徑征衣

冷雪亂炊烟野店迷燕市還騰千里價爨鄉聊借一  
枝棲懷君不敢焚詩草珍重編頭玄晏題

又

石城門外聽歌驪一曲增添無限思冰蘖三年畱我  
續鶴琴萬里與君隨孤踪落落悲同調別緒茫茫覓  
後期計到江南春色滿北風須寄折梅詩

元素云一  
結唐音

送及門張子鶴年侯子于東北上

唱罷驪歌興未休送君此去到瀛洲可知一路騰天

馬不負平生飽汗牛

徐云蒼  
渾似杜

庚午廿三日南寧署祭竈

是日先  
君誕辰

雪茗香柑理素筵好從冷署祝殘年  
韓窮欲送文難就賈苦無酬詩可捐  
穉子何知能媚竈老兄強事尙  
追先天涯歲月成虛度此夕翻令骨肉牽

和施采臣首春原韻

石城歌管簇芳年院院鶯花別有天  
翠點輕陰迷砌草綠垂疎柳暗村  
烟窗前幾日能畱雪樓外何人更  
扣舷所許文章吾樂事倩君珠玉佐春筵

畢云唐  
調合作

春雨 和施韻

立馬春郊省石田但憑時雨飽艱鮮  
雰雰雪後優還渥淅淅風前清且漣  
嫩草含煙鋪斷壟夭桃綻露繡  
重堦宮衙閒冷無此事日逐東臯望有年

徐云字字生新刻露  
元素云五六是春雨

瀟湘江 曲靖城外  
大江也

遠出千山風怒號潺湲一曲抱東臯  
秋清岸坼鼉鼉

見夜靜榔鳴鶴鶴高霧氣時蒸溟海雨浪花常作楚  
江濤幾回把酒臨橋上閒說莊生玩濮濠

其二

中有天生石壩

孤城峭壁聳千尋倒映清江百尺深橋對夕陽紅炤  
堞波涵秋影碧翻林鐘聲隔岸催昏曉石脉橫流自  
古今散髮釣翁疎懶甚斜橫漁艇卧花陰

其三

禹力何年鑿地開波光森森浸樓臺白牽一帶穿林  
去青擁三峯入鏡來古岸春深繁草木大荒雨後走

風雷伊人水涘分明在望斷蒼茫費溯洄

元素云三律雄渾壯  
濶不減杜陵風格

郡倉告竣清明日太守名宴

高眺春郊草色柔神倉新構壯邊籌筵開萬柳隨佳  
節地接三峰據上游座側杯傳黃綬動樓頭響遏白  
雲浮風流太守民同樂旣醉還畱略獻酬

元素云情  
景俱到

路過馬龍值王博庵刺史是夜納寵詩以贈之  
盈門花燭爛君家驛路相逢引興賒雲雨何期來此

夕衾裯且喜抱天涯酒因合香偏艷詩爲催粧致  
更嘉爾貌我才兩不厭曾憐孤館卧霜華

徐云善戲謔詩  
亦一氣渾成

龍淙石屋

以下六首俱  
步范督憲韻

洞溪深處認難真畱待仙郎此問津祇是鴻濛一片  
石頓開門戶渡遊人

墨雨菴

從來無字乃真經何物游龍能竊聽敢是文章多妙  
用灑成墨雨潤生靈

畢云一  
氣如話

一草亭

亦風亦雨一茅茨獨立亭亭萬古支爐內乾坤應不  
老壺中日月復何疑

畢云起句突  
兀其來無端

宛轉溪

曲曲仙源何處尋松關緊閉五雲深胡麻誤引天台  
入莫認劉郎作有心

趙云解人。落第後嘗有句云採藥空山歸路長  
白雲紅樹兩茫茫天台神女無情思總把虛名賺

阮郎亦與先生此作相發

人莫癡丈

不似希夷只好眠  
支撐勁骨傲長年  
戲將袍笏為狂態  
笑認前身是米顛

元素云自負何等

臥石

風清頑石亦能廉  
不受人間賸積沾  
天地虛閒渾自在  
夢回常繞萬峯尖

海潮寺步韻

海邊古刹構危峰  
水色山光掩映濃  
松泛濤音疎雨落  
波吞樓影淡雲封  
輪迴今古門前轍  
棒喝乾坤嶺上鐘  
一片空明真自在  
那些渣滓到吾胸

趙云頸聯新警但如此棒喝仍喚不盡乾坤鈍漢○畢云先生胸中原無渣滓

聽瀑樓

滄浪歌罷晚風寒  
倒湧珠泉落玉盤  
俗吏不堪塵萬斛  
一聲清聽可誰瞞

趙云清真可為俗人下砑

和吳一峰諸生贈韻

吾道安樸樾曾不事馳逐承乏此殘區翻悔出幽谷  
茹荼苦所甘剗肉憂方篤舊逋怨桑麻新賦空杼柚  
無米強作炊未穀先求鬻蠟冗集萬端珠淚傾千斛  
况以駑駘姿初步邯鄲足軼壘媿非才更鑒前車覆  
敢言儒者師謬爲民司牧補苴乏長策勞心惟畊讀  
野草漸還青雞窓初復綠對君臭若蘭贈我唾如玉  
尺幅遍生光臨風香馥馥飛鳴指顧間俗吏頻拭目

趙云言言剗切直與  
賈哭鄭圖並堪千古

### 再遊海潮寺

湖光倒影插奇峰疊閣層臺拂樹濃偶看閒僧掃徑  
籜細尋幽刹杖籬筇我懷朗朗潭中月誰識蒼蒼嶺  
外松漫道山中經濟少朝烟暮雨泛疎鐘

元素云五六絕妙禪偈  
覺眉山顯用佛書似拙

### 讀唐益功昆仲壁間韻有感

停驂小閣意遲遲雙萼欣看棠棣詩我亦關情催白  
髮數聲漁笛傍人吹

徐云  
唐調

### 午日仝郡司馬鄭盧二公限韻

花飛四野似河陽  
榴火初明照草堂  
啜茗風生盧子  
座譚經望重  
鄭公鄉  
爭看金縷旋龍扇  
好借鷓鴣棲上  
鵲梁  
媿我無才能  
獻頌祇將清話泛蒲觴

徐云堅老中  
意自流轉

其二

天中日麗接滇陽  
萬里棊隨宓子堂  
無事時看庭舞  
鶴有懷人照月生  
梁士民薦艾迎新臘  
兒女簪花憶  
故鄉  
世態浮雲何足問  
陶然一舉累千觴

元素云情景相生  
王岑佳什○三四根  
二句來五六根  
首句來章法精嚴可式

午日石城有感用前韻

城南有瀟湘  
江并李膺碑

榴紅蒲綠送端陽  
悔別青青五柳堂  
大塊猶能容瓦礫  
人情何事妬津梁  
屈平抗節沉湘曲  
元禮清名寓  
夔鄉  
凭眺不禁多感慨  
無如痛飲醉霞觴

辛未秋以李元禮碑課諸生詩擇其尤者依韻

和之二首

望重龍門謁者稀  
祇今落落一荒碑  
丘墟萬里知何處  
俎豆千秋到此時  
石駁依稀傳姓字  
霜清凜冽見  
鬚眉  
忠魂不惜來邊徼  
莫逐西風怨子規

元素云高響過雲深情尚  
友詩與碑俱當千古不磨

又相傳天旱碑  
前禱雨必應

先生幽恨向誰開菊老葭蒼抱石隈  
死地尚遺妻子累罪身莫釋宦闕猜  
登龍自昔交如水破柱於今驚作雷  
勿怪世人頻假禱想將風雨瀉餘哀

南署秋日和畢霞嶺偕諸生讀書禪教寺作

遙想松關落木深秋光澹宕讀書心閒邀好友  
花間鹿細玩奇文牘裏蟬霽月一簾還照舊殘碑  
幾處尚畱今挹來不盡探幽興一派嵐濤匝梵音

元素云一起遙情勝致霓  
裳縹緲之音通體亦稱

畢霞嶺率諸子讀書禪教寺寄韻賦答

十年曾此卧煙雲澗壑風清夜氣芬  
小草攜將琴鶴伴空山畱待蕙蘭羣  
繩牀再對知何夕鐵硯加穿又幾分  
寄語吾兄頻課讀莫教兒輩負多聞

元素云聲情穩合趙云高山  
流水三弄絃上真能賞音者

九日卽事

黃花開遍病初痊風雨孤城接碧天  
詩爲征租寧減興酒因合藥竟多緣  
鄉心萬里雲山外宦况三年水

雪前強事登高等勝蹟不逢最上莫言旋

趙云劍南  
得意之篇

南寧署中除夕一首

又是一年將盡夜漫從萬里數歸期  
燃燈悉照囊偏溢爆竹頻催斗漸移  
此後行藏應有定從前得失竟何知  
春回觸處皆佳境柳媚鶯遷花滿枝

雁字十首步伯兄藩青韻

凌空健翮趁霜磨斜映雲箋幾度過  
體近龍蛇長潦倒圖分爻象更婆娑  
連聲急寫三秋賦帶草頻書百

韻歌一鶴亭前閒對月競看蚪落文河

趙云體厚  
而意圓

其二

筆花墨草竟何憑羽化翩躚陋結繩  
團練軍前驚唳鶴題名塔上趁飛鵬  
臨池亂點梅花帖夾岸頻將穗篆騰  
一幅晴空憑卷放不須摹畫太競競

趙云不作  
小儒點綴

其三

空青萬里淨無塵秋色橫拖鳥篆新  
羽遞星馳邊月

冷聲諧鶯囀上林春峰回斷浦書還寄水落平沙印  
更真俗吏不堪勞案牘蒹葭鴻鵠想伊人

張云搜剔盡  
致思入風雲

其四

濡毫拖墨故飛廻碧草黃花斷送來裂帛有懷憑我  
寄書空無蹟倩誰猜妙傳法篆人爭羨秘奪神工鬼  
亦哀遊向冥冥何所慕五陵虛負射雕才

畢云何處着一毫色相  
詩至此可謂鬼斧神工

其五

墨陣排空興自狂輕描淡寫總成行彩雲斜掛銀鈎  
曲素練橫拖玉柱長月下揮毫渾入化風前閣筆未  
全荒偕將鳧鳥輕來往何事蠅頭碌碌忙

畢云無字不  
典雅切題

其六

東塗西抹逐雲飛柳骨顏筋帶露肥夜月空濛函白  
壁朝霞掩映點朱衣薦彈紙上無真是揣摩天心不  
盡非高唱陽春頻得句翩翩玉屑吐霏微

元素云五六  
妙有寄托

其七

秋冷灘頭夜警圍一行驚起夢先歸  
唵和月露聲聲落氣挾風霜字字飛  
應惜豐毛棲塞草不貪殘啄茹  
山薇回看恰是來賓候  
潑墨連篇殆庶幾

其八

雨過晴霞簇錦紋驚翻鴻爪  
撰新文題名領袖三千  
士挾策胸藏十萬軍  
聲斷衡陽猶愛羽飛廻  
冀北亦空羣  
霜毫肯許畱青瑣  
不惜頻書諫草焚

其九

八字橫分陣陣過  
啣將小草出山阿  
青雲振甲冲文  
斗白雪高吟比素鵝  
塗墨翻書憐子幼  
排行逐隊讓君多  
寄懷萬里憑雙羽  
珍重秋風施兔羅

張云鴻飛冥冥弋者何慕

其十

漫道人靈物盡愚鍾  
王妙義悟須與春秋序  
述成青史南北文  
移逐白駒嚙嚙聲  
傳金石韻行行寫出鳥  
蟲模空中若許長  
操筆壓倒千秋風雅儒

趙云此首寓意尤佳體格蒼老  
元素云十首不減公安原唱

甲戌春日諧諸友浴溫泉

携得春温滿浴泉同人漫酌興翩翩一腔冰炭融成水四壁氤氲散作煙不染纖塵清澈骨還分餘澤惠流鮮世情寒煖都無用調燮功歸於自然

南寧署中感詠

甲戌三月閱邸抄行取得邀俞旨行將去矣

瞻念茲邑復不禁感而爲詩以志別焉

四載馳驅萬里身低徊往事嘆勞薪憂民有淚都成血媚世無能莫效顰簇簇亂絲方就緒稜稜枯木可

知春此行繾綣心難了竚望賢侯事業新

徐云稜稜風骨藹藹仁言

畱別李遊府

李公寄姓吳今復焉

季子風流自不羣於今更喜識龍門照人渾是真肝膽遇我全如老弟昂俠氣噴虹時看劍閒情對月共開尊應知雄畧將推轂別去魂銷淚欲吞

元素云應酬中絕構

曲陽諸公暨紳士耆庶遮途致餞詩以答之

祖帳何當辱下陳陽關一曲暗傷神寮朋詩卷吞聲

讀父老壺漿滴淚親幾本蕙蘭畱別署連朝風雨洗  
征塵媿非慈母民猶子雜沓輪蹄辨未真

元素云沉  
切入情

行取北上途次卽事

邯鄲郢州皆  
閱歷地也

萬里承恩敢後期征塵冉冉病支離問餐野店黃梁  
夢屬和新篇白雪詩藥裹頻翻須老友星軺暫歇弄  
嬰兒宦遊五載囊惟此兩袖清風答主知

張云亦似  
劍南佳境

黔楚道上卽事

萬里長驅六月塵囊空四海不知貧道窮山水難於  
蜀用盡金裘厄似秦食後藥前支病骨風晨雨夕歎  
勞薪祇因圖報君恩急富貴浮雲何足詢

張云字  
字清越

中途送別同里劉麟洲東歸

時余小  
恙初愈

檢點離愁小恙前岐途旣至倍蕭然幾年把臂心同  
照何處挑燈床再聯將母日長歸思急報君術短  
獻身先吾家無物勞相寄爲道平安直萬錢

趙云一腔忠愛  
具見詩人本領

賀新郎步韻 懷別

攻苦寒窓起正何妨宦况如水交情似水爭奈炎涼  
翻世態頓結胸中塊壘強嘖笑令人羞死且喜文章  
知己在好唱酬贈我魂銷矣調寡和觀幾止千秋  
義氣層雲裏老風塵暫歸蓮幕頻登屐齒倒瀉詞源  
珠萬斛兩兩齊驅杜李恰萍水相逢到此春草春波  
兼送碧聽驪歌欲遣誰能爾况復是多情子

又

古道猶存否歎年來驚趨蠅逐不堪株守悔別青山  
掀白眼故我覺非吾有又何論齊竽秦缶海內遭逢  
無定局問誰稱耐老英雄手先尙父垂綸叟 飛熊  
事業難爲後勉相從芸窓帖括管窺二酉博取微名  
來萬里慚愧寒泉細溜灌不滿南箕北斗羨爾豪華  
詩酒客看馬牛下吏風塵走可得勾機緣偶

元素云二詞蘇陸  
之匹句句自然

滇遊草卷之二終

燕邸草

燕邸草卷之二

精酌容香...

來萬里...

事業...

燕安...

眉白...

燕邸草

不夜呂琨星石著

壬戌和說巖陳夫子禮闈司考十四韻

矯矯人中鳳

白虎譚經早

奎壁寒芒吐

玉尺恩方重

共識憐才意

桃李蹊邊繞

彩筆生香艷雕蟲愧巧淫登龍殊自喜摘句和長吟

趙恒麓云  
清新雋永

壬戌東歸和武承張夫子贈別元韻

東山歸去好藏身漫向林臯問縉紳富貴逼人憑絢  
爛詩書畱我且沈淪浮生聚散渾無着世態寒暄自  
不倫贏得龍門分一座文章許國豈終貧

久旱喜雨

時謁銓  
在京

夜半驚聞霖雨香曉看花露欲霑裳久耽火宅迷情  
性乍入冰壺滌肺腸布穀未苗猶速駕降桑無葉亦

攜筐吾徒空荷蒼生望不及天心仁愛長

畢霞嶺云  
蘇陸合作

都門答壻劉易庵寄韻

長亭弱柳不勝情無那青青遣此行南浦春深今日  
別東牀月照舊時盟十年花竹縈鄉夢萬里風雲壯  
客程旅况何勞頻問訊羞將華髮謁公卿

家元素云  
情景俱到

重九前用舊韻

幾度西風吹薜蘿長安秋色又經過誰憐白雪知音

少獨對黃花得句多  
索米羞沽彭澤酒  
采萸愁賦望鄉歌  
開尊小集還高興  
坐待恩流太液波

徐子文云全是性靈運化  
與時下填砌故實者不同

答王素卿寄懷

王十洲使君行取入都素卿隨任同寓正候考時也

不着詩顛卽酒魔  
知君病向此中多  
吟聯玉屑春飛

雪醉別星橋  
夜渡河旅館  
棲遲嘶倦馬  
掖垣咫尺聽

鳴珂彈冠貢禹爭  
乘興肯逐秋風  
寂寞過

徐云清遠一結尤見豪上

和王素卿重九遇雨二首

風雨無端起旅愁  
楓林葉落暮雲稠  
飄飄紫塞空  
鎖零亂黃花徑  
亦幽雁杳予懷人  
寂寂呆閒此夕意  
悠悠白衣往事成  
佳話曳杖何妨上酒樓

趙云清而能腴

其二

亦知沽酒堪酬雨  
爭欲登高却愛晴  
落帽風吹黃葉  
盡開尊  
秋向白雲生  
鴻書忽下寒潭影  
錦瑟還傳空谷聲  
珍重餘寒侵病骨  
帝城歌舞最移情

元素云盛唐清麗之篇時下手望而却步又云亦近少陵一結忠告

乾清門引見行取各員

帝城曙色散飛煙待 召金門次第傳月落西山爭

就日雲開北闕共瞻天承恩萬里遑需後報政多方

愧在前 行取部文到滇未及一月即蒙各憲咨送到部之日滇省獨先 拜舞瑤階依

聖主幾忘感慨萃中年

徐云堂皇體自有真意

### 長安雪後早朝

雪積長安暮靄橫五雲開日見新晴光搖銀燭烟含  
白氣接瓊樓月共清袖簡霜飛晶闕近鳴珂風送玉

山行昨宵筆底天花落疑是江郎夢裏生

趙云自是唐人應制體

送別劉仙崑侍御 余病兒寄為劉子今愈篤矣

薊門西向奏驪歌拔淚風前灑碧莎去國孤臣貧自

在驚心猶子病如何吾生知己唯薑桂此後懷人問

薜蘿握手送君無可贈敝裘珍重曉寒多

趙云真氣流溢

春暮招飲張家園 分韻得盡字

載酒酌東園莫使春歸盡石砌碧生苔花開紅未隕

亭亭古木森匝以蘭與菌中有斷壑流間用危橋引  
徐步坐幽軒山水供接軫醉卧黑甜鄉良朋莫相哂  
但存物外身而無胸中吟煙霞不我羈城市亦爲蟹  
應作如是遊重來心自允

徐云雅有靖節風味。元素云晉人之清艷盛唐之和雅俱在箇中

送別張仲和侍御假旋

河橋折柳颺晴暉旅病初痊興欲飛補袞曾經焚杜  
草瞻雲正待舞萊衣聯牀宿雨挑燈別數卷新詩濯  
錦歸此去東山好自愛徵書計日出黃扉

又

落落燕山道迢迢膠海行幾年還共話此日忝齊名  
春草河梁夢鶯花故國情所嗟同輩去慚愧負躬耕

趙云盛唐雅音

送史胄司學士奉祭闕里

四望皇華祖 帝京風流獨讓使君行宮墻數仞由  
茲入俎豆千年與有榮論樂爭傳吳季子譚經尚覩  
魯諸生東山泗水憑登眺蒐討弘文集大成

畢云典雅稱題

丁丑關中重九後十日偕同事登明遠樓

登高漫賦憶重陽一補從前興未遑

重九正當奉鎖使監閱技勇

院深巖仍舊日岑樓雅集盡他鄉曾無霧縠迷青眼

何事風簷凜皂囊眺罷歸來強覓醉莫教孤負菊花

觴

畢云清穩

和貢舉嚴獲菴司馬登明遠樓韻

秋到層樓氣更清烟寒雁杳碧霞生晴開北闕連

雲迴爽對西山映日明命世奇才多磊落招賢盛地

重台衡追隨左右心如照肯使英雄嘆不平

賦別柏菴兄旋里

二三兄弟宦遊情瀕老相依學壯行入世須防為衆

敵報君終信是孤貞原來有我真成累此去無人

不識名

兄舊作有有生都是累無我又何名之句

抽得閒身渾自在一腔

丘壑儘崢嶸

徐云東坡得意之筆

悼姪孫廷鈞寄諸姪孫

此子虛過三十庚周身衰經了平生二齒失恃呱呱

泣廿載靡瞻踽踽行大父母還懸半窆弱妻孥不瞑  
雙睛余今老矣兼爲客後事肩承孰與名

元素云不必論是唐是宋只是古今來第一真性情詩自應必傳趙云一字一淚不必讀十二郎文

良然  
良然

### 賦贈宮蘭注貞女

猗蘭性本幽江籬匹其潔天若妬芳姿風雨故摧折  
傷哉汪氏女從一凜霜雪十六殞所天泣涕幾三絕  
母也不諒人之死復何說生雖未同室死願同一穴  
逾時志愈堅成仁姑用譎泉路急追隨奔赴驚濤滅  
我聞令女風感慨爲悲咽聖化淪濡久閨媛砥貞  
烈旦晚賜旌閭日月同招揭藉非風雨摧孰從標奇  
節

趙云清空一氣如話。元素云成仁姑用譎是古今大作用本領

爲維揚劉紹翁九十壽二令郎一行  
人一學博

桑陰十畝卜幽棲竹塢松關望欲迷教子篝燈挑夜  
雨留賓剪韭洗春泥星軺坐見花迎轡木鐸行看杖  
擁藜節屈上元初介壽春光恰與大年齊

徐云壽詩如此  
風雅自難舍旃

贈睢陽郡守盧雷飛

公善詩宦滇時曾與共事

幾度長安夢滇南憶舊遊交情初半面宦况恰同舟  
每以平生贈還將好句投余才虛兩掖君業冠諸侯  
邊徼烽烟淨中州禾黍稠清風迎五馬膏雨遍三丘  
常對詩盈篋相思月滿樓溯洄人宛在又復是新秋

畢云中  
有情憐

戊寅正月送別家任菴之海陽

聖朝崇吏治簡俊宰南荒予仲膺 新命乘春令揭  
陽桃花紅驛路柳色碧河梁合浦珠還媚韓山梅正

芳廉能爾素著清白我家常鳧鳥輕千里原鴝各一  
方彈棊思宓子飲水憶吳郎馴鹿追前轍鱷魚徙舊  
洋庭閒朝看鶴署冷夜焚香養性宜清淨平情戒激  
昂谿深人所忌坦易政何妨廿載老舅弟岐途熱肺  
腸悵然惟握手行矣莫沾裳屈指鋒車到相期金馬  
旁

元素云言言金石字字性情

贈粵東總戎家位參

粵祖鷹揚久詒謀今復昌宗支分海岱間氣聚衡漳

萬甲藏胸臆千秋并頡頏雄心常說劍抄智自盈囊  
磐奠山如立波平海不揚勲名垂竹帛節義凜風霜  
創業良非易傳經舊有方吾家世清白只此爲君觴

趙云開口已入古人堂與○元  
素云典則禡皇不是尋常贈答

和孫靜子同年見寄元韻

十年不復問樵漁華髮能驅歲月除世態太濃情愈  
淡宦途漸熟興偏疎何當捫舌從封事只合顰眉效  
著書漫道藏身無著處乾坤剩有一匏盧

趙云彈丸脫手爽致  
迎人如對西山朝氣

九日小飲分韻 得蕉字

相逢剪燭話中宵鹿鹿浮生半夢蕉坐對黃花人似  
菊吟聯白雪句如瑤耐貧可便言風采卻病差堪慰  
寂寥買得螯卮須盡醉一廬風雨共簞瓢

送別張仲和侍御罷歸

四郊風雪出燕都鍊骨稜稜誰贈襦抗疏原因酬  
主聖解簪終是識臣孤好從月下吟山鬼漫向城頭  
問野狐畱得二勞芳徑在他年早晚共携壺 二勞大勞小勞

名山

元素云一氣渾成慨當以慷非至性直筆人必不能作如許言語

曾弔

任南寧時城南有李膺妻化石遺跡曾弔以詩今有感而憶之

曾弔龍門窳婦碑舊題新感淚雙垂獻身匪為成名急捫舌何妨報效遲與既死猶妻子累寧當生弗聖明知傷心於此深無限莫謂區區狐兔悲

元素云史筆出以風雅此詩人大本領

庚辰春闈再與監試

春深桃李艷紅綾踏入龍門記幾曾四戰棘闈心慘澹兩飄繡服事威稜遴才媿乏珊瑚網剔弊愁無智

慧燈所望空群惟伯樂肯教騏驥溷飛蠅

和王慎菴宗伯招飲明遠樓元韻

十日三登百尺樓元龍佳興典觥籌窗橫遠岸連雲迴簾捲輕風帶霧收珠玉揮成歌白雪醇醪醉罷賦黃流萍踪聚散渾無定好會何妨重整遊

關中雨口號

奎壁星輝遍九垓何當烟霧滿蓬萊天池指日濯新錦應有蛟龍帶雨來

和陳媿輔登樓原韻

媿輔以禮曹執事未得入簾

斜倚危樓眼界開  
五雲深處任徘徊  
吟成白雪君先  
達夢到黃梁孰後催  
玉尺空懸明月去  
鮫宮肯放夜  
珠來蹊邊桃李知  
無限還待劉郎手  
白栽

元素云渾浩有  
氣一結尤妙

### 清明後一日登明遠樓

傑閣空明對夕陽  
公餘小酌杏花香  
三層危構天如  
近十日趨蹌夜未央  
眺遠可能驅霧縠  
登高何竦佩  
萸囊霏微恰好  
昨宵雨一洗  
闌中舊肺腸  
句有  
所感  
寒食日聞勉菴五兄告假歸里

雁聯鷁序已頻年  
歸棹驚聞午夢牽  
棠棣吟成折柳  
句壘篴吹罷着  
驪鞭看花不復能  
留雪輟食非徒爲  
禁煙想到雍門惆悵處  
瀟瀟水色動人憐

趙云無  
一泛語

### 送別垣中勉菴兄假旋

宦聚天涯老弟  
舅春郊折柳送燕門  
夢回一枕黃梁  
道酒泛千尊  
綠野園勿藥已銷  
泉石癖不貪終沐  
聖明恩只余落落  
臺垣裏何日重聞  
伯氏墳

### 送鹿有上侍御歸養

雪積江干隱翠微長歌陟屺望春歸相看半是悲風  
木幾見飄然舞彩衣丰采爭傳新諫艸經綸還整舊  
漁磯停杯無限臨岐淚不向陳情孝子揮

元素云真詩以性情勝然體製亦非近人  
可及。趙云仕宦而忘親讀此可勝三嘆

和薛文篁年兄元韻

宦海萍踪寄此身浮鷗幻蜃認難真悔將白眼覓知  
已羞向烏臺學媚人燕市竟成屠狗會滄江常想釣  
蓑隣  
聖明無事容臣拙落落幽懷好自詢

趙云此詩之妙  
不可出一贊詞

哭兄 有序

余同懷兄弟有三現其季也幼而失怙賴兄成  
立長兄藩青氏筮仕餘干三年致政甫抵舍卽  
捐館遺仲兄輝伯與余撫存諸孤勿墜厥緒已  
巳冬余謁銓選滇之南寧令萬里迢迢單騎之  
任魚雁不通者四載骨肉之愛尚何言哉甲戌  
蒙

恩內擢赴部候考及奉

命歲已臘矣次正乘間回籍居無幾缺出促赴補與

兄團聚言歡者僅五閱月耳丙子春杪兄復東  
裝來顧年雖逾耆體甚健起居燕笑和樂且孺  
及冬言歸余送出廣渠門收淚而別嗚呼詎知  
此卽永訣時耶後遂以病聞頻年醫藥漸臻彌  
留今訃音且至矣嗚呼已矣遺余隻身矣歸窀  
期迫竟不得扶棺一痛言之涕泣誰其與語感  
而成句安顧其鄙里

記得東郊兩淚揮白頭兄弟可堪違雁聯紫塞先廻  
杏瓜種青門再摘稀和樂空存棠棣什急難不及脊  
鴿飛悔予薄宦蹉跎久悵望蕪園胡不歸

夏日卽事

四壁炎塵撲面飛久耽火宅竟忘歸問心未許人情  
是涉世還疑吾道非坐對冰盤清入夢旁觀碁局慎  
知幾盆花數種堪幽賞檢點公餘早閉扉

畢云寄情高遠未易  
一二爲流俗人言也

夏日咏蘭

一種幽香澹澹舒移來空翠滿庭除衙盃坐翫清於  
茗把卷行吟韻在書棲跡煙霞原自若署名臺省有

誰如對君竟體消煩熱秋老還期不負予

元素云風騷絕調俗筆何曾  
夢見。趙云何減晉人清談

重九前一日畢霞嶺趙恒麓同過小齋暮飲

西山暮靄漾晴明為愛登高預訂盟插菊花當連夜

放落霞句正待人驚

坐中曾向索詩

相看莫負螭頭望自顧

殊慚蝸角名潦倒一尊醒醉眼曾關國計與民生

趙云老境妙境試問作  
詩者能如此運故實否

和趙恒麓九日韻

年年結伴敞高臺計到長安第幾回陶令非關索米

至洪州有興趁風來故鄉人其他鄉月今日詩酬昨

日杯摘句撚鬚方屬和籬邊銀鹿報花開

畢云五六  
秀絕寰區

賦答王素卿

思君不見竟忘年夢想依稀落月前車笠欣逢當日

面肯教嘯咏谷風篇

檢書

深柳堂前滿架書閒拈一卷了公餘於中莫辨根銀  
字拋却牀頭續酒醪

蕙蘭

爲愛幽芳晚結胎  
深冬護得幾枝栽  
爭看綠笋尖於筆  
定有花生夢裏來

灌荷

玉露金莖不染泥  
偏宜活水灌根柢  
亭亭綠蓋擎天

立何事花開五色迷

畢云寄

意清遠

看柳葉桃

一名假竹

飛腮紅艷柳眉清  
竹節稜稜亦預名  
濃淡叅觀原有

意非關尤物便移情

畢云意

在言外

蚊雷

滿腹貪饕暗裏來  
不期有口竟成雷  
穢形未到聲先到  
一着風聞氣自摧

畢云諷刺深渾

意仍歸本忠厚

爲李雲亭六袞壽

洋溢聲名舊懸弧  
甲始週一夔多醞藉  
二阮足風流舞雪迴  
歌席飄香結綺樓  
不須勤吐納意氣已千秋

祝李雨亭太翁八表  
我過大野古麟州相傳勝蹟麟來遊應是地靈人亦  
傑君家舊屬謫仙儔詩酒文名不自有儒雅長者真  
風流深柳堂中日萬卷游焉息焉乃忘憂蹊邊莠李  
手親植馥馥門墻爛盈眸庭教玉書尤可讀競誇繡  
綬良弓裘博得榜花供戲綵家聲燕翼稱詒謀才爲  
世出藏若拙人自古稀年更浮祝君豈惟如四十佇  
看紫氣乘青牛五千餘言爲道德八千餘歲爲春秋

畢云率爾操觚  
自有塵外之致

送魯畱耕司業 予告歸里

先生 予告值重九亮節幽香淡如菊聞道潞河已  
買舟揚舲擊楫波迴復憶昔鸞坡視草時珠璣隨地  
湧百斛當代重儒崇師席清望咸推西江宿敦詩說  
禮習業勤翩翩多士廣樂育杞梓梗楠盡入選樹人  
無異樹大木化雨正濃槐市陰秋風忽憶匡廬瀑安  
得追隨長者車五老峯巔卜小築

元素云典重題出以  
逸致自爾岸異不羣

述懷

大化隨義馭人生惜禹陰但毋虛歲月何必問升沉  
憶昔蹉跎久相將攻苦深青燈銷壯志白首遇知音  
余年未四十 髮已盡白 萬里分符去 九重錫命臨清班邀特  
簡正色凜臺箴 庚辰 御製臺省箴書賜衙門 畛域原宜化風霜豈  
異任量材移冷署結念滌塵襟退食翻書校開尊帶  
月斟五更醒酒力百事繞鄉心松里丘墟盡荆釵老  
病侵塗鴉憐弱息 時五歲幼兒初學識字 斷雁叫孤岑親舊謫  
難免田園廢不禁逢年惟樹穀教子勝遺金別有山  
中趣好從物外尋歸與及早賦行矣莫沉吟

華云精  
系卷

燕邸直卷之三終

附伯兄遺草

不夜呂瑋潘青著

蟬琴十首

高調千秋西蜀臺冷然聰爲蟪蛄開聲從樂府荒唐  
出身自鈞天豪放來笑我一生無韻致輸君透體是  
風雷芳心欲訴傳清徵誰惜絲徽三弄才

其二

菊籬西畔竹牕東時聽絲絲換羽宮兩翼冰綃輕按  
譜一腔玉露善吟風乍遷喬樹聲闕放爲避行人曲

未終寄語螳螂莫近如機心已辨七絃中

其三

蟲響蠅飛樹滿枝一聲高出萬聲卑正音不作鶯簧巧清韻殊慚蛙鼓吹矯首長鳴山谷應臨溪幽咽水流澌也知難入時人耳逸興何妨自悅怡

其四

瀟瀟疎雨日晴初逗出微風徹碧虛十里愁聞尼父耳三秋未卜屈原居桐岡毛羽輪鳴鳳柳下絲綸出聽魚學得曲成雲水去翛然天地一蘧廬

元素云三秋句暗用卜居中蟬翼爲重意

其五

時挾清囊上碧梧似憐同調訪寒儒自舒天籟聲偏壯屬和連羣興不孤譜出金風鳴物變驚翻蝶夢解人愚元音一氣渾無句肯唱鉤輅同鷓鴣

其六

日日枝頭數落花知君性不近諠譁天然節奏循時序卓爾風流傲物華焦尾何當臨火宅猗蘭應自惜煙霞欲同聲氣覓何處多在潯陽五柳家

其七

吟罷朝暉送夕陽綏冠弱雨致軒翔心閒雲水情無  
物氣足清真韻倍揚落落高踪時去住便便腹笥有  
宮商駱丞已往知音少只好飛鳴單父堂

其八

羽衣瀟灑韻悠揚應是仙姿降大荒響出楓林雲欲  
住夢回槐國翼初張商音一變催桐葉羈客三秋怯  
旅裳頓易性情偕侶去葭蒼露白水茫茫

其九

八月寒螿聲斷聯關情應在履霜前哀鴻欲下泣麟  
淚征馬長嘶唳鶴天謝却塵氛須辟穀叫殘勝地想  
逃禪一從落葉翻新曲那得南風撫五絃

其十

寄棲終日此園林懷抱清商理古今露氣噏噓真有  
韻風前高下一無心夕陽鞍馬聲催急古渡帆檣調  
轉深解得雍門惆悵意驚飛蕤鐵動寒泠

元素云寄托深遠格律渾堅是以六義之旨而兼四唐之長者

雁字十首

臨池心事已銷磨  
驀見書空嘹唳過  
五色雲箋姿卷放  
八分墨陣影婆娑  
乘時高唱秋聲賦  
按譜清諧子夜歌  
昂首欲攄投筆恨  
拈取下銀河

其二

羽毛豐滿壯懷憑  
指點六書代結繩  
巢幕羞教同燕雀  
凌雲未許讓鯤鵬  
興高山水王摩詰  
意在秋風張季鷹  
覷破炎涼思避地  
一生出處自冰兢

其三

霞明碧落淨氛塵  
恣意飛飛墨蹟新  
爲爾長吟來白雪  
致余短髮去青春  
大文元自畱天地  
幻化何須別質真  
回想之無今夢夢  
鰕生媿是識丁人

元素云五六空清  
高亮識解尤超

其四

河洛睇詳腸九迴  
飛鳴豈爲稻糧來  
魯魚習舛餘糟粕  
亥豕傳訛憑識猜  
帶影修成真箇箇  
連聲寫出更哀哀  
文章歷代尊科目  
誰許題名塔上才

畢云一結自  
喻慨然凄然

其五

恰是米顛張旭狂曉霜影裏一行行點疑蝌蚪形濃  
小畫帶龍蛇勢短長藏舌衡陽消地氣揮毫沙漠破  
天荒羞將白髮從章句憐爾春秋也自忙

其六

楓林風起葉初飛蘆岸沙涸蟹正肥乍集鵝羣揮白  
練驚塗鴉跡換烏衣帛書瀚海人消息烏篆秦碑文  
是非意匠何需畱翰墨化工已自寫精微

其七

似披羽檄潰重圍搖曳金風振旅歸柳葉橫空邊月  
冷梅花翻譜陣雲飛聲遷東嶽吟梁甫稻熟西疇懷  
采薇蒼狗白衣多變態遨遊形勝許知幾

其八

一幅晴光碧錦紋經身點綴卽斯文真成行列分羲  
象草帶聯翩摹右軍葉上雕虫空獻瑞窗前編蠹罔  
成羣心傳妙不存踪跡却使秦皇何處焚

其九

橫舞直飛次第過風雲月露滿山阿寄書有足何須  
鯉惜墨如金嬾換鵝卧雪清魂驚夢少挾霜丰采上

林多錦心尤善迴文體來往高踪慎網羅

其十

鉛槧呻吟悔自愚文章宗匠在須臾六朝班管揮芻  
狗三晉風流擲隙駒體格生成真運用心裁獨出自  
規模鬼當夜泣人多事倉頡前身一腐儒

趙恒麓云十律擅絕天工非人巧可及合  
星石先生和韻讀之一時二難真足千古

附伯兄遺草終



